



皇明文衡卷之七十八

神道碑

兵部尚書贈榮祿大夫少保兼尚書鄭公神道碑

王直

兵部尚書鄭公既卒之明年

皇帝悼念不已詔特贈少保兼兵部尚書進階榮祿大夫而
官其子儀為主事儀奉公衣冠以歸將以某年某月某日葬
于某里之原而述公之行請文以刻諸墓道嗚呼公故人也
其可辭公諱塾字孟質別號朴齋鄰之宜章人曾祖某祖某
昔有孝行而不仕父子輔為學官縣令名重當時及公貴祖
父皆贈兵部左侍郎妣李氏王氏皆贈淑人公早喪母祖母
李撫育之見其不凡最鍾愛曰是子能大吾門公孝友勤儉

出於天性而撫弟妹尤篤其於學問不待程勸選為邑庠生而秦和王敬先為訓導循循善教公亦勉勉善學學成取進士遂入都察院理刑獄以廉平得名永樂癸巳拜監察御史時

車駕在北京有言南京鈔法阻滯命公往察之衆謂將起大獄公往擒市豪一二以歸奏曰市人聞令皆震懼今鈔法已通矣

上頷之而罷倭寇犯遼東公往按問戍守之失律者凡百餘人皆獲死公為開陳其可矜狀甚明

上然而宥之山海關吏卒邀阻行人以取財亡逃之人則覺昧縱之去弊積滋甚公廉得之歸至關悉擒治抵罪弊為之省丙申北京營造執役之人累鉅萬

上念有病者命醫與善藥又慮其奉行不謹命公察視之公躬履其地令潔其穢汚而時其藥食由是病者多不死戊戌石州人有詣 闕告變者曰州民與陝人羣聚千餘謀不執上擢公為陝西按察副使往理其事果實即以官軍勦戮母貽民患賜之楮幣給驛而遣之公至安其誣乃反獄亡命妄言異說死即具以聞

上命山弗問而誅其造誣者宣德己酉陝右饑華亭宜川尤甚公私廩皆竭公巡歷其地憂之乃移勞縣粟賑焉羸病不能興者命官府煮粥食之民以全活庚戌至納潁曼歸道聞父喪哀愈甚每號痛輒欲絕其治喪一用古禮其祭亦如之服除拜應天尹 輦轂之下賦急役繁公一以養民為務事無大小苟可以興利去害無不用其心至於市征田稅皆酌

其平豪猾不得為輕重賓興之歲公設科取士厚其禮而峻其防得人為多且擢節其費以待會試故事集而民不擾視異時蓋省十三四歲大熟麥有兩收者民歸德於公公拒弗受正統改元進拜兵部左侍郎時西鄙有警尚書王公往視師公獨任其事

上嘉其才荆湘民多隸戎伍公家亦與焉至是特除其籍以示寵已未京師淫雨壞官民廬舍公奏曰此陰氣為沴兵陰也皆臣等不職所致乞罷歸田里

上慰勉之師征麓川公率蔣貴可任卒有功衆人以為知人天下軍衛總小旗當代者於例必就試京師有道遠無資不能來者終身不得代公請各於都司試之人以為便時有言欲變易軍伍使南北之人各適其土性下羣議衆依違其間

公曰此舊制不可紊稍有變易將不勝其弊各將誰歸卒不勳嘗自念曰治軍吾職也當為國家惜其力養其銳氣以備不虞故凡軍家利病有當興革者必為

上言之多見信從已已邊報虜入寇

上命治軍旅而權姦獨主親征不與外廷議及 詔下大臣皆以為不可即上章請留不聽公從行出關屢奏言虜犬豕不宜屈

至尊惟指麾諸將足以成功不聽權姦惡其數言事欲踈之勅公與戶部尚書王佐隨老營至懷安墜馬幾殆從者請少留懷安就醫藥公曰

天子在前吾為大臣豈可託疾求自便力疾而往至雲中車駕回鑾然行止疾徐惟權姦所命至宣府虜寇踵至公深

以爲憂再上章請疾驅入關而嚴兵爲殿皆不報最後公詣
行殿申前請權姦怒曰汝腐儒安知兵事再妄言必死公抗
言曰我爲社稷生靈而言何得以死懼我權姦愈怒叱左右
扶出公與王公相對泣帳中明日次土木營中無水士馬皆
饑渴虜四面集矢下如雨衆奮欲戰又爲權姦所沮須臾師
覆公遇害蓋八月十五日也生於洪武乙丑某月某日年六
十五娶吳氏有賢行子男一卽儀女一嫁同里士人歐陽瑄
孫男三琦琳珍公學博行莊仕宦四十年風裁凜然見重於
士大夫威行惠施近悅遠懷服仁蹈義至老不衰此其平生
大節也權姦誤國而卒陷焉豈獨公之不幸哉嗚呼銘曰
允毅鄜公逢時之隆學古入官荐躋顯庸執法在 朝爲名
御史再陞外臺其行愈偉京尹堂堂百郡所瞻惟少司馬戎
律有嚴遂陟夏卿君子所重噫其逝矣云誰不慟人道之大
曰義與仁仁義不違何愧於天刻文墓碑負以龜趾永永不
亡疾其在此

禮部右侍郎諡文肅錢公神道碑

公諱榦字習禮吳越武肅王繆之後初吳越歸宋子孫皆顯
仕其爲吉州防禦使曰惟濟子昕遂家廬陵三傳至貴和徙
吉水諸源爲望族曾祖以吉祖立志父好德母赤岸陳氏皆
以德義重鄉里公生而喜學父母兄弟皆鍾愛凡所師友者
見其文敏而思深且多出腹藁莫不奇其才從學南昌訓導
頽子明而卒業於翰林修撰張伯頽永樂六年江西鄉試第
一明年會試中第十時

車駕幸北京廷試不果由是從容京師間縱觀 聖朝政化

之羨聲明文物之盛四方萬國謳歌朝覲之會同而才益進
九年廷試取進士入翰林爲庶吉士尋陞檢討叅史職甲辰
會試命公爲同考八月

仁宗皇帝即位一新庶政陞翰林侍讀與知制誥洪熙元年
賜勅褒贈父母及封其妻 勅同修

太宗皇帝實錄

仁宗皇帝升遐

宣宗皇帝正大位勅修

仁宗實錄公亦與焉時有詔許焚黃公承命以往丙午促
召還京偕太子少保金幼孜等入見命完修實錄二年春闈
則命公爲同考官三年戊申元夕賜文武近臣觀燈萬歲山
賜宴公及文臣賦詩以進賜之鈔四年八月應天府鄉試奏

請考官命公爲之十二月朔是日霜寒甚

上命光祿賜在廷文臣羊酒以禦寒曰

皇祖考在位每旦常有賜今朕多事忘之汝勿忘五年

兩朝實錄成

賜金織襲衣銀幣考禮部會試陞翰林侍讀

學士蒙給誥命贈父以已官母與妻皆贈宜人痛寵命之不
主及也哭之過哀七年

駕過史館有作併賦招隱之歌以示近臣蓋是時天氣清明
聖心悅豫懷賢覽古悠然天趣之高發見於吟詠於此蓋可
見也八月考北京鄉試十年乙卯春

宣宗皇帝晏駕

今皇帝即位二月上

宣宗尊號賜白金秋九月詔修

宣宗實錄十二月賜文綺丙辰正月改元正統大臣建議開
經筵 詔可其奏公位為講官三月

上臨軒策士公讀卷勞以羊酒賜宴于禮部戊午四月進
宣宗實錄

上御奉天門慰勞甚至賜白金文綺織金衣襲陞翰林學士
賜宴于禮部八月應天府鄉試命公為考試官四年充廷試
讀卷官六年考北京鄉試七年壬戌為行婚禮賜紗衣紗帽
金相香帶等物九年甲子三月大新國學成

上紙謁 先聖躬行經奠禮幸彞倫堂命祭酒司業以書易
進講從臣坐聽公與其列七月公上章乞致仕弗允且降勅
論天下憲臣及縣令有難其任察舉以聞公舉所知而人以
為當十年乙丑禮部奏試

上復命為考官三月進三倫書蒙賞齋冬十月 欽陞禮部

右侍郎公以老病懇辭弗獲諭使就職 朝廷稽古右文事
多由禮部公夙夜祇慄惟恐有弗稱

上又命兼署吏部公益謹畏不自寧求去益切 詔許之公
鄉大夫饒送出都門皆有詩公獨取歸去來辭長歌以自快
人莫不以為榮而喜 聖德之厚也公孝友忠信篤於倫誼

厚生送死君子稱之至姻戚故舊亦無悖於理者在位三十
餘年以文章議論為士類所敬樂於教人學者亦樂從之遊
與文衡者八讀卷者二佳時暇日擇勝往遊長篇短章發於

歌咏以揚太平之盛美及老而歸順老之堂子孫侍教者十
五年凡所著述論思聯為大卷有應制集詞垣藁詞垣續藁
歸田藁藏于家後世傳焉天順四年九月嬰疾五年四月益

甚五月二十二日終于正寢春秋八十有九計聞

上為之嗟悼命禮部賜祭工部為治祠墳諡曰文肅配王氏

繼娶曾氏皆有賢行子二長鸞傳先卒次鳳躍習舉子業女

一人孫男某曾孫男某初公之歸即欲為安樂窩得地于其

里洲背山而營焉至是鳳躍以其親戚高僉憲所述行狀請

於予曰先考文行公知之且交最久神道之碑非公孰宜為

予老且病不得辭乃勉副其意詩曰

洲背之山有崔者墳是誰所營武肅令孫惟此令孫克勤帝

載由唐而興日廣且大歸于有宋以德以仁衣冠相傳有士

有民天祚忠孝賢者相繼維時能來繫公是視公之遊此旌

旆于下山靈來瞻風卷雲舒植木有本曬水有源公之本源

人其式旆公每來歸子孫習其誦詩讀書有永無斁惟公世

家海內所聞政事文章亦煥其羣我與為友式篤于義九十

而終尚利後嗣公官三品神道有碑我作銘詩百世之詒

奉天靖難推誠宣力武臣特進榮祿大夫柱國太保

寧陽侯追封濟國公諡武靖陳公神道碑銘

李賢

永樂初靖難功臣不下數十人然克享祿位於悠久者鮮矣

惟太保寧陽侯陳公歷事

五朝出藩入衛凡六十餘年而以今終嗚呼盛哉公諱懋字

舜卿鳳陽壽州人高祖萬曾祖福三祖大一俱追封涇國公

妣皆涇國夫人父亨從

太祖高皇帝定天下以功陞都指揮使洪武三十二年從

太宗文皇帝靖內難復以功進都督同知卒贈奉天靖難推

誠宣力武臣特進榮祿大夫柱國追封涇國公諡襄敏母韓氏涇國夫人襄敏公三子長恭嗣爲都督同知次忠府軍前衛指揮使季卽公也器宇宏遠識見超卓尤負膽氣工騎射年弱冠卽從父領兵爲前行凡壩上廣昌蔚州大同白溝濟南之戰與父同功又禦敵于單橋藁城西寨東平固鎮小河戰尤力累陞右都督永樂初論功行賞進封奉天翊衛宣力武臣特進榮祿大夫柱國寧陽伯食祿壹千石子孫世襲賜誥券資予甚厚六年受 詔佩征西將軍印總兵鎮守寧夏 賜寶纓白漿牛半以爲戒嚴之費公至鎮號令一新凡胡人降附者親撫綏之務得其歡心乃已七年選精兵自將大敗虜于境外由是殘孽遠遁邊陲爲之一清捷聞加封奉天靖難推誠宣力武臣特進榮祿大夫柱國寧陽侯食祿一

千三百石子孫世襲復賜誥券及貂蟬冠服錦綺寶纓八年春

上親征北虜公將左掖兵十一年冬還鎮十二年春

上復親征公仍將左軍俘馘甚衆明年還鎮十四年夏有報虜酋馬哈木死者公未之信曰是欲懈我邊備也卽申飭諸將固守已而虜衆果來見有備而退二十年春

上復北征公率所部兵以從還京 賜玉帶金綺龍衣且聞

公有女賢淑禮聘入宮册封麗妃尋命歸寧父母資予駢蕃

當世無與爲比二十一年 詔公統陝西寧夏甘肅三鎮兵

出勦叛虜公率衆直抵賀蘭山擣其巢穴盡收其酋長也先

士千部落及其牛馬駝羊數萬凱還

上大悅寵資有加二十二年復隨

上北征師還以公爲殿至京遂領前軍都督府事
仁宗皇帝登極以公勛戚有勞加太保復官其長子昭爲勳
衛

宣宗皇帝臨御待公尤厚樂安州之平公領京營兵衛

上有功還有金帛人口之賜二年復鎮寧夏三年春奏徙靈
州城以便防守四年春得玄白二兔以進

上賜璽書獎諭兼有玉帶龍衣馬圖之賚六年還京十年命
佩平羌將軍印移鎮甘肅正統改元

今上皇帝嗣位念公勛戚之舊召還奉朝請十三年冬福
建民鄧茂七作亂僞稱閩王勢甚猖獗

上曰此賊非老將不能平特命公率師往討之至浙江有
欲分兵先守海口者公曰如此是絕其生路則爲死寇矣不

從明年春師次建寧有欲屠沙尤二縣者公曰如此則益堅
賊心矣乃下令諭之俾各復業能斬賊首者官賞與王師同
於是降者日衆公曰賊勢已孤無能爲也乃五路進兵一鼓
而收之凱還賞勞加等命領中軍都督府事尋兼領宗人府
事景泰中加太子太師天順改元

皇帝復位因遇益隆固辭宮師許之六年春忽得疾踰秋不
能起上言臣老死不足恨惟

陛下以生民爲念任賢用能以圖太平之治則國家幸甚

上覽之惻然曰看卿所奏足見忠誠宜尚加調治以副朕懷
久之醫藥弗効遂薨時天順癸未七月十六日也距生洪武
己未二月九日享年八十有五訃聞

上震悼輟視朝一日追封濬國公謚曰武靖遣官諭祭加賻

及營葬事

東宮及諸王亦各致祭公偉觀脩髯語音洪亮曾懷磊落敬禮文士雖位極人臣未嘗妄自尊大而南征北伐口不言功當爲中興名將稱首配嚴氏封寧陽侯夫人早卒子男六人長卽昭次曰福寧俱早卒次曰晟爲勛衛次曰潤次曰瑛次曰昂女五人長適應城伯孫傑次卽

恭順榮穆麗妃次適東勝右衛指揮使張昭次適府軍左衛指揮使張輪次適都督同知馬良潤等卜以是歲某月某日與嚴夫人合葬于都城西香山之原銘曰

壽有陳宗父子傑特涇公濬公後先開國

文皇靖難孰多勛勞涇公輔之首秉節旄奮武桓桓所向披靡大事垂成星殞于壘濬公承之以篤世忠鼓勇前馳涇公是同躍馬揮戈到處蹀血乃伯乃侯成此茂烈金符虎節屢鎮邊陲于征于狩無遠不隨聞寇勦勦東南震恐濬公征之遂輯其衆巍巍勛戚歷事

五朝龍衣玉帶惟

帝之褒壽嘏旣純允顯六紀容與承平宿將無幾煌煌愍冊賁此令終生死哀榮孰如濬公西山嵯峨佳城在側史臣勒銘千載輝赫

恭順侯追封涼國公諡忠壯吳公神道碑銘

天順辛巳逆賊曹欽謀爲不軌潛浹七月二日早朝入內爲亂恭順侯吳公先於是夜一鼓聞之卽與其弟廣義伯琮約總兵懷寧伯孫鏜走詣長安門告變於是禁門不啓賊計遂窮舉火燒禁門公等率兵勦殺奮不顧身賊雖誅滅公已捐

軀矣嗚呼先機告變公之忠也殺賊喪元公之勇也然則逆賊之敗豈非公之功乎

皇上聞公之歿哀悼殊深輟視朝一日追封涼國公諡忠壯凡秘器諭祭賻儀之類悉從厚典復命有司爲營塚壙以安葬之蓋痛念勛戚之臣爲

社稷而死故報功之典倍徙尋常也既而琮詣予泣且告曰先兄不幸歿於鋒鏑茲欲立石墓前以白於世非先生之文不可辭弗獲按通政司參議趙君昂之狀公諱璋字廷璋其先西涼人祖諱允誠永樂中累以戰功封恭順伯父諱克忠嗣伯爵洪熙初以賊里恩進封恭順侯正統甲子以征虜功加太子太保己巳秋禦寇北邊力戰而死追封涼國公諡壯勇母楊氏封涼國夫人叔父克勤官至左軍都督府左都督

亦同兄歿于陣追封遵化伯諡僖敏公生而英銳謀度爽闊親賢好善未嘗以門第驕人以故摺紳士大夫樂與之游相與議論古今講說道義而公頗能識其旨趣尤閑武藝精騎射方其父叔禦虜之際公亦在陣中發矢射虜伯父叔矢盡而亡公始就執其酋長念公忠義之後釋之乃還京遂嗣伯爵天順改元

皇上復位公以勛戚隨侍應對稱旨自是日備顧問賚予甚厚尋命理左軍都督府事公益感激夙夜效勤一旦遭變委身則其允蹈忠義視乃父乃叔爲無愧矣公生於永樂癸巳十二月一日享年四十有九配李氏故會寧伯之女有淑行封侯夫人生子男二長曰鑑次曰鏞次曰錫女一適指揮使劉玉琮嗣廣義伯遵化公之子卜以是年八月某日葬公

於順天府房山縣之新莊從先妣也銘曰

世祚之家忠義無幾有巷吳門展也無比彼美忠壯虎視耽耽遵化之姪邠公之男忠以捐軀壯以禦侮相繼如歸光照忠土飭終追榮惟

帝之恩匪

帝之私惟以報勛聞矣泉宮西山之麓秘器旅陳穹碑載陸仁者有後公則成仁銘以貞之何千萬春

禮部尚書致仕贈大保諡忠安胡公神道碑銘

我朝名公鉅卿聰明特達者多矣若器識宏遠福壽隆長惟武進胡公一人嗚呼休哉公諱淡字源潔別號絜菴其先淮安宿遷人有諱藩者仕劉宋爲太子左衛將軍遷豫章數傳至諱臧者仕唐爲侍御史子常州刺史瓊生特因家平裳

遂爲武進人持四世孫曰宿仕宋爲樞密副使宿十一世孫曰中立爲常州制置中立生昭公之高祖也會祖庸仕元爲江浙儒學提舉祖禎爲常州路醫學錄考宗仁隱居不仕皆以公貴贈光祿大夫少傅兼太子太師禮部尚書曾祖妣章氏祖妣徐氏妣李氏皆贈一品夫人公生而髮白彌月方黑母夢一僧持花以遺之覺而生公居數日有僧至家索觀公見僧卽笑僧曰此吾師天池高僧後身也命我求見以笑爲誌果然聞者咸驚異之公自幼端重不好嬉戲弱冠入邑庠洪武中領鄉薦登庚辰進士第授兵科給事中尋遷右給事中公勤識大體士林譽之

太宗文皇帝入正大統公供職如舊永樂改元秋以奏對稱旨陞戶科都給事中丁亥

上察近侍中惟公忠實可託遂命公巡遊天下以訪異人爲名實察人心向背時御製性理大全爲善陰騰孝順事實書成俾公以此勸勵天下以故雖窮鄉下邑軌跡無不到在湖廣間最久丙申秋還朝丁內艱乞終制不允尋進禮部左侍郎明年往巡江浙諸州授嘉議大夫癸卯復自均襄還朝時車駕親征北虜駐蹕宣府公馳謁行在所上臥不出聞公至喜而起且慰勞之曰卿驅馳良苦賜坐與語凡所歷山川道里郡邑豐嗇民情休戚以至所聞所見保國安民之事悉爲陳說上欣然納之向所疑慮者至是皆釋比退漏下四鼓先是仁宗皇帝爲太子監國時有飛語上聞

文廟屬公往察之公至以所見七事皆誠敬孝謹密疏以聞上覽之大悅自是不復疑仁宗嗣位特賜誥命授正議大夫資治尹已而聞公曾有密疏疑之乃轉太子賓客兼國子祭酒之官南京未幾閻章奏見公所上密疏深嘉其忠方議重用之而龍馭上賓矣宣宗皇帝卽位復禮部左侍郎兼職如故洪熙乙巳冬公自南京來朝

上素重公及入見顧問良久卽留任行在禮部事宜德政元春進尚書是歲秋漢王謀叛事竟公贊

上親征事平公受賞賚甚厚復給叛者家屬四人丁未賜誥命授資善大夫復賜近第一區於長安右門外給閹者二人戊申

上嘉公忠勤特賜銀章四其二曰文恭世家曰清和恭靜蓋
嘉美褒美之也尋以公生辰 賜宴於其第秋八月公扈從
巡邊至會州而還已酉命兼詹事府事夏五月復扈從此巡
時常民有豪橫者既抵于法悉以田宅賜公辛亥命兼行在
戶部事 聖節御製詩一章賜公及蹇忠定楊文貞文敏三
公且曰朕哉膺天眷惟爾四人贊翼之功因賜宴盡醉而罷
新建禮部成命光祿設宴勛戚公卿皆往賀公公以為盛事
立石廳事之右倚任益隆每燕見
上虛心問曰卿有何言得其章奏即施行之時有芝產于公
署人以為公和氣所召

今上皇帝踐祚亦惟圖任舊人待公尤厚凡軍國重務皆與
聞加授資德大夫正治上御每考績必有賚予甲子以年至
七十上章乞致仕

上以公精力未衰慰勉留之已巳

上親征比虜命公留守京師秋八月進太子太傅階榮祿大
夫景泰初賜誥命辛未春公因災異數見乞放免以回天意
不許尋進少傅壬申兼太子太師二俸兼支公固辭一俸癸
酉復 賜誥命進階光祿太夫自後每歲引年乞歸皆不許
丙子復因災變乞賜罷黜亦不許時公年八十二忽疾作艱
於步履明年

皇上復位公喜不自勝扶疾入 朝而筋力不可彊矣遂乞
謝事且辭師傅二職

上方重用耆舊憫其老皆從之 陛辭賜白金寶纒金織襲
衣給驛舟以歸復賜璽書有卿宅心允臧處事惟慎雖經變

故無改厥常之諭歸之日鄉人老稚聚觀者以億萬計公陳
所受賜於堂感激泣下遣家子長寧詣闕申謝

上念公歷事累朝遂官長寧為錦衣衛世襲鎮撫俾歸終
養公之弟克恭克寧克誠時年皆七十餘蒼頭白髮燕樂於
一堂遂扁曰壽愷優游桑梓者七年疾復作召諸子前曰爾
輩圖報國恩勿墜家聲遂瞑目而逝天順七年八月八日
也享年八十有九終之夕常州守卓天錫夢公來辭已而聞
終大以為異計聞

上為之震悼贈太保諡忠安遣官諭祭於其家復令有司營
葬事恩榮始終世莫與比公為人平易寬和廉靜寡慾自奉
淡薄起居有常居官敬慎一毫不苟歷事

列聖無纖毫過舉蔚然為一代名臣立朝幾六十年

士類甚多下知春闈貢舉天下之士盡出其門平居未嘗疾
言遽色雖庸夫孺子亦知其為長者暇則手不釋卷喜為詩
文晚年譽望益尊其酬應愈劇曾不厭倦所著育之軒集若
千卷又嘗輯錄醫藥經驗者曰衛生易簡方經進又有律身
規鑑俱行于世公配范氏早卒累贈夫人繼張氏累封夫人
子男四人長曰洪即長寧居母喪廬墓有司關事

朝旌其門曰孝子次曰衍以武舉得官沒於王事次曰龍錦
衣衛指揮僉事次曰翎女三人長齊林玘次適成國公朱儀
次適陽武侯薛琮孫男一人曾孫男一人銘曰

大明盛時有臣胡公從容其間以篤其忠始為父即乃教曹
子輿論攸歸多士咸喜作賓春宮遂長春官

列聖倚之四海又安國之老成進位師傳溢恭維人翊我

皇度公在 朝廷六十春秋祥位優游莫之匹休公身雖亡
中有不死懿行崇功昭彼信史
皇恤者英曠典是承隧道有碑儒臣刻銘

吏部尚書致仕贈太保諡文端王公神道碑銘

公諱直字行儉別號抑菴系出瑯琊晉太傅導之後也導輔
東晉遂家金陵後數世有崇文者仕唐爲吉州刺史因家吉
州又數世孫贊仕宋爲戶部侍郎徙居泰和代有顯人曾祖
以道祖子興隱居不仕父伯貞仕 國朝爲肇慶知府俱以
公貴累贈少傅兼太子太師吏部尚書妣皆贈一品夫人公
早喪母而父以事去賴祖母李夫人撫育自幼端重異於常
兒家負力薄刻苦讀書永樂改元遂領鄉薦明年登進士第
時

太宗皇帝篤意古學詔選進士曾榮等二十八人爲翰林庶
吉士俾讀中秘書冀成遠大之器公在選中感激奮志不數
年文辭追古作者

上以公卓越諸士召入內閣凡機密之政屬執筆焉尋授翰
林脩撰

車駕巡幸此京

仁宗爲皇太子監國留務之重選任尤嚴時翰林則留黃淮
楊士奇與公三人輔導公夙夜勤慎不懈中外咸倚重之及
再幸北京公在扈從遂與脩

太祖實錄未成以憂去服闋仍入翰林陞侍讀

仁宗卽位進侍讀學士

宣宗爲皇太子慎選宮僚首陞公右春坊右庶子仍兼侍讀

學士凡經筵講義及文武群臣誥勅皆以屬公又兼記注至於聖政聖訓之當書者皆錄之以備纂述進階奉議大夫宣宗卽位與脩兩朝實錄成進詹事府少詹事仍兼侍讀學士有白金彩幣襲衣寶鏹之賚進階中順大夫

今上嗣位詔脩先朝實錄以公總裁書成進禮部左侍郎仍兼學士賞賚如前又之以禮部缺人命公出涖部事宗伯胡公大喜闔部之政悉付之公處之裕然若素習者吏部尚書郭璉去位詔以公代之命下士類皆悅進階資善大夫歷再歲有無賴不得志者以選撥事嫁禍於公給舍御史交章論列乃直公誣加授資德大夫正治上御正統己巳秋北虜犯邊軍駕欲親征公獨以爲不可率廷臣上疏正之不獲特命公

留守京師於太子太保兼吏部尚書尋進階榮祿大夫景泰初進少傅去申兼太子太師進階光祿大夫公累疏求退不允天順改元

皇上復位歸任舊人公艱於步履不能朝謁懇乞休致并辭師傳二職詔特許之賜以璽書有忠清之操簡于朕懷之

語復出白金文綺寶鏹賜之給驛舟以歸公方面脩髯器宇宏偉望之若神仙中人天性嚴重寡言笑居家儼然及至接人和氣可掬學富才敏詩文清激四方求者接踵屢典春闈文衡得人最盛在翰林三十餘年恭勤不怠如一日與王文安公齊名特稱註王又以居第在東稱東王先生士類莫不拭目海內想聞其風采及位冢宰益加廉慎時方面官罷廷臣薦舉專屬吏部公益留意人才委任部屬凡御史出巡歸

者必令報其高下以備拔用自是四方多號得人奔競之風
爲之一息居第隘陋曾不屑意一切世味安於淡薄

朝廷重公之德每優禮之免其朝謁及退休居家杜門不出
日課諸孫讀書而已所著有抑菴集若干卷行于世天順六
年九月二十三日以疾終于正寢享年八十有四訃聞

上爲之悼惜特贈太保謚文端遣官諭祭于其家復令有司
營葬事公配陳氏累封一品夫人先公二年卒子男四人長
曰績翰林檢討君母憂以卒次曰績次曰穆次曰桐女三人
長適梁相次適蕭旗次適袁傑孫男十人曾孫男七人績等
卜以天順七年正月六日葬于邑之信實鄉喜坪之原乃以
公所爲墓誌示賢請銘其神道賢從公遊最久公未嘗待以
屬更又引之同升平生之知未有過於公者謹次第其事而

系之以銘銘曰

國之明昌繫彼才賢有一挺生豈偶然侃侃王公天賦其
秀有聲煒然大江之右鑿坡鳳閣容與翔翔惟學之昌惟譽
之芳遂秉鈞衡不倚不忒百司庶府位稱其德位稱其德又
我烝民

列聖汝嘉保傳師臣公之旋歸旣祿且壽國瑞耆龜士仰山
斗公之云亡軫我

聖衷節惠二名錫命三公有美哀榮無然愧忤銘在豐碑元
老之墓

皇明文衡卷之七十八

皇明文衡卷之七十九

神道碑

榮祿大夫太子太保吏部尚書贈特進光祿大夫太

保監忠肅王公神道碑

彭時

公諱翱字九臯姓王氏其先世家樂州自公之父避元季兵
亂徙居滄州之鹽山故今為鹽山人公生有異徵氣清質秀
甫十歲能讀書父即勉以仕進克自勤勵學遂有成永樂乙
未登陳循榜進士第二甲第一名改庶吉士甲辰授大理寺
右持正因註誤左遷行人宣德丙午用廬陵楊文貞薦陞行
在山東道監察御史當是時任風紀者多事矯激惟公謹重
建大體上下賢之乙卯陞都察院右僉都御史正統丙辰奉
勅鎮守江西政不苛刻吏民畏愛未幾往浙江除土豪理鹽

法能聲大著已未四川松潘番城爲患命將往征以公叅贊
軍務公欲懷以恩信有來降者卽以所賜白金寶楮易牛酒
搞之番酋酋已感悅率生番來歸受約束者一十八寨邊境
以寧辛酉出鎮陝西飭兵備壬戌往遼東提督軍務特遼東
守將屢奕機

朝廷以爲特簡任公且授以便宜之權公至守將以下庭參
公詰責玩寇失機故將斬之得兵再三哀請乃已於是官軍
咸股慄莫敢不用命逾月躬出巡邊治障塞嚴斥候仍簡閱
戍卒更老弱賑貧窮配鰥寡俾咸室家人人感激其治訴訟
輒行贖罪法雖人命亦然口償命無益死者之家而賕或足
以濟其用故行之不疑有指揮孫環者因溺關鞭戍卒至死
其妻女哭之相繼死他卒被鞭者亦環一家三人公判曰

甲死以罪妻女死于夫非殺也其令環償葬埋費環後爲將
有名非公優容不及此癸亥陞左副都御史丁卯率師出境
破虜有功陞右都御史己巳陞左都御史是年秋虜酋也先
分級寇廣寧公下令堅壁清野以困之賊乃遁去公在遼東
十數年勤訓練廣儲蓄食足兵強爲諸邊最其拔用將校如
施聚焦禮輩皆以勇畧知名亦非他邊所有也綏懷東夷女
直恩威兩盡往來朝貢者無不惕威而感德景泰壬申

召理都察院事尋加太子太保會廣南西賊寇擾攘兩鎮將
官互相觀望不卽捕 朝廷命公總督兩廣軍務公至推誠
撫諭蠻夷向化者多思恩知府岑瑛土官也屢有勞效或疑
其反側公令瑛領兵屯桂林聽調人言乃息其他上官有爭
職者公度勢量情予奪得宜人心帖服癸酉少傅王文端公

以清德雅望居吏部年且老矣 朝廷思得剛明果斷者以濟之乃召公還命以太子太保兼吏部尚書士夫以得人相慶乙亥公年踰七十乞致仕不允已而乞歸展省又不允命有司爲公起第于縣郭西蓋以慰安其心也公掌銓衡予予持公道進退人才必察其實而於抑僥倖杜請託尤嚴選法爲之一清天順丁丑

英宗復位罷舊官僚公上疏乞致仕南陽李文達公言於上曰王翱廉謹老成吏部非此人不可乃不聽其去任用益篤已而文達被讒黜公力言其淳實可用以故文達復被寵任焉當是時

上眷遇公加隆特官其子國子生竑爲錦衣衛副千戶而賞賚以金玉束帶錦繡衣服銀瓶磁器等物歲無虛月屢召與近臣同遊西苑南城及扈從獵近郊燕賜優渥一時擢用廷臣惟公言聽有出他人薦者亦必待公而後決也每召見便殿訪問從容呼以老王而不名其見敬禮如此辛巳秋加太子少保甲申

今上嗣位賜銀五十兩鈔五千緡是冬命遇雨雪免朝參乙酉春復加太子太保公年雖高精力如少壯人然無歲不引年致仕皆蒙 優詞獲答勉留不果行丁亥公有疾

上命中貴挾御醫往視并致白粲上尊之賜七月疾益篤其請益懇切

上不得已允之居數日遣中貴齎 賜勅諭并金織衣一襲銀三十兩鈔三千緡時已不能就道至十一月六日卒于京邸距其生洪武甲子二月十二日享年八十有四

上聞訃嗟悼贈持進光祿大夫太保諡忠肅遣官諭祭營項
給驛送還其鄉以卒之明年五月初二日葬于順梁園之原
曾祖進昌祖大老父得林俱贈榮祿大夫太子太保吏部尚
書曾祖妣徐祖妣劉妣張俱夫人配宋氏先公二十三年卒
累贈夫人次張氏亦先卒子男一卽琦也女一適河南參政
賈傑孫男二長田次麟國子生女二曾孫男女二公天資仁
厚操履端方居官涖政謹繩墨蹈規矩一毫不苟且其待人
外若毅而中實寬和好惡所加善者悅而惡者不怨論事語
簡而質是是非非確乎其不可易持已廉潔無私而自奉其
儉薄自初任勤勞于外與晚夙 廟堂皆然未嘗以壯年異
其心蓋年愈高而志愈勤守愈約忠 君愛國之誠愈篤而
不懈真履德君子也跡其所以享盛福榮名無愧於古之大

臣者其在此欤太宗伯妣公狀公行詳且實矣公子琦欲刻
石置于神道請予文之予素敬道不苟可以焯德信後義矣
咨辭昔乎文不足以旣其實也銘曰

有美王氏世居于欒積善秉義隱處是安避兵鹽山遂定厥
家再傳而顯揚德振華其振伊何有公特起降誕之祥虹光
兆異乃勸儒業乃第科名游歷顯位駿望鏗錡公出四方憲
度清肅弊革利興兵民依服其在 中朝恪秉銓衡賢才彙
進治道乃成公何能然惟德之進惟公惟廉惟勤惟慎公以
按物綈直準平廉以律已正潔水清勤以涖事夜寐夙興憤
以存心晨惕夕兢祇事

丑朝始終若一爲 國元老爲士矜式官躋一品壽踰八旬
推今較古如公幾人公今往矣疇不嗟悼匪私于公惟德是

好渤海故郡高墳我我於乎忠肅千載不磨

姚文敏公神道碑

惟姚氏系出有虞其先家汴梁宋南渡徙居桐廬世傳詩禮
多知名士而未甚貴顯貴顯自公始公諱應學大章損菴其
別號也生一歲而孤性資穎異克志于學十三遊邑庠博通
經史爲文雅健有奇氣正統戊午以春秋舉浙江鄉試第一
會試辭乙榜入太學祭酒李公特勉司業趙公家一見器重
之少保楊公溥聞名且遣子墀從學而公不自滿復遊錫忠
愍公之門請益士大夫莫不高其志壬戌會試中第一與從
弟龍俱登進士入榮耀焉癸亥擢吏科給事中首以脩德舉
賢選風憲立盜法等八事爲言多見採納用子夏舉奉
命祀北鎮雨應期至丙寅持節冊封 晉府徐濬等王未還

而母夫人卒公以不及奉湯藥爲恨號慟幾絕葬祭一以禮
已已服闋復舊任是秋

英廟北狩國勢危疑大臣勸進郕王議未夫詢諸六科公曰
社稷大計爲大臣者當任之而詢諸小官何邪事乃定十月
虜騎犯京城禁兵出戰未大捷公請遣 勅召邊將楊洪等

領勁騎入援虜聞一夕遁去景泰庚午廷臣薦公才堪大任
陞南京刑部右侍郎振舉廢墜刑獄以清士申改南京禮部
奉使雲南考察官吏癸酉還本朝留任禮部丁丑正月
景泰不豫尚書胡公濙在告公強之出率文武群臣問安且
請復立太皇太子正位東宮疏成未上而

英廟已從石亨等請出復位矣亨因挾私弄權軒輊大臣而
進退之謂公南京刑部已而有言公才者

英廟悟驛召至京轉禮部左侍郎賜二品服戊寅調吏部時
王公翽爲冢宰選用人才資公爲多矣未遷禮部尚書先是
典禮者未愜人望公任之奏對從容儀度閒雅

英廟喜曰禮官真得人矣甲申

今上嗣位公贊襄大禮中節合宜首開經筵 命公侍列有
白金文綺寶楮之賜乙酉成化紀元

上畊籍田幸大學悉從公請而行禮成宴賜有加公嘗云輔
政當謹諸始丙戌秋率群臣上封事有思艱難崇節儉謹名
爵戒逸欲之言

上欣然嘉納勉諭甚至丁亥正月賜金織麒麟文綺戊子復
率群臣上疏言

皇上春秋鼎盛而震位尚虛宜均愛六宮以繁子嗣服食言

動宜悉遵

祖宗舊制言激切有感動意是秋

慈懿皇太后崩卜異葬內閣執不可公率群臣覆奏詞嚴而
義正於是合葬祔廟之禮以成公在禮部所知貢舉僥倖止
息凡遇災異必引咎辭職疏上報蒙慰留復乃乞祭先塋

上曰卿老成當朝夕輔朕未可言私於是衆知 朝廷倚重

公者至矣尋轉吏部尚書寔己丑六月也公釐正銓法務愜
輿論品藻人物必得其情至於方面轉遷亦必以序有欲撓
之者卒不變辛卯秋通前秩滿九載加太子少保遣中官賜

羊酒寶楮以示獎勞是冬彗出軒轅公上疏反覆諷諫冀有
感悟壬辰南方大風雨水溢公疏言自前歲彗星示變以來
四方漸覺多故自古禍亂常起於災傷饑饉之餘毋謂天道

姑息有象無應只圖因循便安於目前也因再上疏乞歸固
不允憂形于色疾遂作

上命太醫朝夕診視仍遣中官賜羊酒米蔬臨問比卒

上震悼賜賻鈔萬緡遣禮部尚書鄒幹諭祭贈祭祿太夫少保

謚文敏 命二部造墳兵部具舟歸其喪所以賁終之典厚

矣公丰神秀朗氣度宏偉言論侃侃達大體居官蒞政精敏

踰人拔擢人才無間新故有以嫌疑騰滂者公不與辯亦不

為之變節隱然如泰山喬嶽不可動搖立朝三十餘年憂國

憫民恒有念慮事有可為必勇為之惟恐已後人先每

廷議大政大事正色昌言人皆悅服一時大臣詞氣慷慨才

識高邁未有出公右者識者謂公可屬大事如周勃吾應變

成務如姚崇世以為知言公所為文豪宏富贈似其為人所

存齋真藎稿一十卷其四書本經義孝者式之公生永樂甲

午十二月十七日卒成化癸巳二月九日享年六十曾祖昂

祖伯華父惟善有隱德以公貴始贈父徵仕郎吏科給事中

後累贈父及祖俱資政大夫禮部尚書祖妣楊妣申屠累贈

夫人配王氏內助賢能累封夫人子男三璧甲申進士兵部

郎中璽國子生瑩女四一適鄉貢士吳春先卒一適國子生

陸竣餘未行其長男女四人俱王出幼者俱側室金出孫男

三敏敬敬女二璧扶柩南還以卒之明年閏六月二十五日

葬于邑金牛山之原立石神道來徵予又予以疾固辭而請

益堅願予與公同朝夕相知為最深自公之逝予悼惜尤至

豈可終無一言以副孝子之心哉乃為采摭誌狀序次如右

繫之銘曰

山川間氣生名賢才高意廣氣浩然讀書下筆文湧泉科名
屢占多士先拜官禁近拱 御筵羽儀燦爛孤鳳鸞時乎景
泰天順間兩京三品看屢遷雲龍風虎會當年文昌高朗姿
台躔仰輔

天皇司化權四方英俊歸陶甄公於是特任調元溜深負重
如山淵忠言讜論累百篇致君欲過堯舜前心勤事左思歸
田終情未遂殊憂煎翻然長往不少延六十甲子纔周天四
海蒼生嗟棄捐百身莫贖有淚漣我

皇開訃誠哀憐贈官錫謚恩禮全英靈歸墓桐江塹金牛山
色開雲煙隱碑巍峩澤且堅神龜鼎肩蟠盤旋焯德有辭可
細鑄芳名耿耿百世傳

侍郎葉文莊公神道碑

公諱盛字與中姓葉世爲吳郡崑山人五世祖秀實惇重好
義元季有暴僧聚徒事焚劫爲鄉里害秀實卽圖上其事手
官捕斬之時稱爲葉義士曾祖茂林妣朱氏祖明贈通議大
夫吏部右侍郎妣郭氏贈淑人考春封兵科都給事中贈山
西右叅政加贈通議大夫吏部右侍郎前母湯母陳俱贈淑
人繼母沈封太淑人公天資穎異自少博學強記下筆驚人
同邑知名士張和見其所業文曰此其志不可量因勸游邑
庠遂駉駉有成矣正統十年奉進士授兵科給事中毅然以
言責自任十四年

英皇北狩 郕王監國公率同列劾將臣扈從者失律敗事
請誅夷之以謝天下然後選將練兵以復不共戴天之讐與
師問罪以除大逆不廷之賊如此則大綱以正大義以明而

聖駕之旋軫可期矣聞者壯之九月 監國卽位頒賞廷臣
公以時艱辭不許十月京城戒嚴公請罷內府軍匠悉遣征
操及虜騎近城又請令有司熟糧料以給戰士遣散卒迎取
軍器于天津以張外援四三日間凡七八 跡悉合機宜虜既
退公言賞功謂罪治天下要務今日之賞罰既行他日之勸
懲攸繫賞罰明信則人人力於事功恥無不雪讐無不復矣
今効勞如孫鏗死事如謝澤韓青皆當賞以示勸其他守關
不嚴赴難不力者皆當罰以示懲從之十一月陞都給事中
時邊境未寧大臣有奏留邊將守京師者公言今日之事邊
關爲急往者獨石馬營不棄則六師何以陷土木紫荆白羊
不破則虜騎何以薄都城卽此而觀邊關不固則京師雖守
不過僅保九門無事而已其如 陵寢何其如 郊廟壇壝
何其如田里之民荼毒何宜急遣固守宜府居庸爲便已而
河南陳州流民扇動命公往視公卽兼程以進除貪虐賑饑
寒威惠並行民用安輯景泰元年春還復上言京城爲天下
根本而入府旱蝗相仍加以虜寇侵擾民不聊生乞議寬恤
俾安生理不然臣不能不爲 社稷憂也八月北虜迭
駕還京將入關矣有隱名具帖言迎復事者大臣見之顧忌
不敢舉公曰此野人無情之言達于

上感動必矣或沮以匿名書公不顧具疏言之有 旨令尚
書胡濙封進帖雖留中而正論有不泯焉是冬公以北虜南
蠻爲患不已上疏請令中外文武要職各陳安邊濟時之策
二年六月天象示異公又條陳弭災防患十二事以上及闡
禁中頗事遊畋又請蒸行

祖宗午朝故事公當多事之秋遇事輒形于疏每疏不下百
十言而大要則以扶忠直抑姦佞恤生民禦外患為主其有
裨於時政為多三年遷山西布政司右叅政監督宣府糧餉
尋命協贊獨石等處軍務先是獨石馬營八城遇虜失守殘
毀未復公列其利害可興革者為八條以進次弟罷行之八
城既復乃立社學以教子弟置醫藥以濟疾病立義塚以瘞
死亡設暖鋪以便行旅均蔬圃以給將士制度品式纖悉備
具而又請官銀五千兩買牛千餘頭摘戍卒不任戰者俾事
耕稼歲課餘糧于官凡軍中買馬除器勞功恤貧諸費皆於
是乎取給自是邊人歡洽歲亦屢登有嘉禾同穎之祥七年
冬以外艱去八城之人如失父母連章乞留而公固辭不可
天順二年

英宗皇帝嘉其能驛召至京而加獎諭尋擢都察院右僉都
御史巡撫兩廣公乞終制不允至廣興利革弊尤盡厥心舊
例廣東監課不出境歲又監積商困往往賂守閩津者越過
廣西市利公以為聽之則法壞而利歸于商禁之則商滯而
利歸于閩津乃請許鹽商計鹽多寡入米餉邊而後出境於
是公私兩利焉時廣西流賊多入廣東為害而兩廣守將顏
頤自異是以討賊不成功公請革兩廣正將立總鎮于梧州
居中調度則賊可平矣衆難其策而不果行公不得已請益
兵

英宗乃命都督顏彪率兵赴之公與彪協議破賊砦八百所
擒斬數萬人而還或又以殺降謗之而不知實積年反復之
賊也天順八年

今上嗣位陞公左僉都御史巡撫宣府脩復官牛官田之法墾田益廣積糧益多以其餘歲易補戰馬千八百餘匹其屯堡廢缺者力脩築之不數月完七百餘所兵民始雖怨之既而恃以無恐乃欣戴焉在宣府屢有建白且請行養老之令于邊褒恤已往賢臣為方來勸

上嘉納之成化三年陞禮部右侍郎五年改任吏部是冬持節封 潘府稷山王六年畿內大饑命公巡視真定保定二府賑恤貧困綏輯流亡既還復命賑濟京民之饑者全活甚衆八年北虜出沒河套為西邊患有言增兵守險者有言大舉搜套驅出河外沿河築城堡抵東勝徙民耕守其中者公受命往議方略奏言搜河套復東勝此皆事勢所難不敢妄意惟增兵守險可為遠圖宜令守臣剴劑邊牆增築城堡收

新軍以實邊選士兵以助守此不但可責近效而亦足為長便也

上是其言九年轉左侍郎公自入佐部政每議禮用人從容贊決其間僚長敬信司屬悅服焉至若事非部分而關當時利害繫生民休戚者遇諸卿必相辨正因而助益者不少一日坐後堂署事忽疾作不能言輿歸西第而卒實甲午三月八日也享年五十有五

上聞深悼惜之賜賻鈔三千緡諡為文莊遣官諭祭營墓以明年二月十七日葬于邑之積善鄉溢瀆之原公為人溫雅間重崇道誼尚名節言動思效古人居家惇孝友莅官清慎勤恪設施不苟與僚友論事不激不隨而言色自若其取人先行檢而後才藝然存心寬厚終不及人之過惡所寓門無

雜客公退手不釋卷考古辨疑殆忘寢食而於世俗声色財利之好澹然不以經心平生為文師歐陽而功業自期於韓范以范公為鄉先正尤景慕焉惜乎大用未究而卒所著詩文奏議總若干卷藏于家公凡再娶先金氏贈淑人繼耿氏刑部尚書耿清惠公之女封淑人子男一長補國子生娶副使張和女女三人一適貢士虞臣一許夏景澄一尚幼公之卒也晨不在側冢宰尹公旻率僚屬經紀其喪事既又狀公行畀晨晨奉以徵予文且曰先父雅愛先生言幸勿辭而公內弟司業耿君裕又申其意以請因撫狀言著其槩系之銘曰

古稱才難今世尚然彼長此短用各一偏優於政矣其文巨傳文或工矣政譽弗宣達觀于世百靡一全而以兼之寧不為賢惟公問亭有本有原公之操履金石其堅清文達識自視無前檢身約已猶恐或愆敷歷中外逾三十年忠君愛民心實勤拳言惟婉切用適方圓惠浹于民威行于邊緬懷鄉衮我其隨肩謀謨事業期著後先何志之遠而去之逆位不滿德繫命于天墓門有碑德烈是鐫於乎文莊百世不謬

圖書集成

